

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj: 32 0 St 368437 21 St
Tuzla, 14.12.2021.godine

Općinski sud u Tuzli, sudija Antonela Đaković, kao stečajni sudija, odlučujući o prijedlogu likvidatora za otvaranje stečajnog postupka nad imovinom dužnika **Opšta zadruga "Povratak" sa p.o. Tuzla, Slatina br. 11**, dana 14.12.2021.godine, donio je sljedeće:

RJEŠENJE

I-OTVARA SE stečajni postupak nad imovinom dužnika Opšta zadruga "Povratak" sa p.o. Tuzla, Slatina br. 11, matični broj subjekta: 3-52, broj glavnog računa: 3383002251371571 otvoren kod UniCredit banke d.d, filijala Tuzla.

II-Stečajni postupak se otvara sa danom 14.12.2021.godine u 09,00 sati, kada se rješenje o otvaranju stečajnog postupka ističe na oglasnoj tabli suda. Oglas o otvaranju stečajnog postupka objavit će se i u „Službenim novinama F BiH“.

III-Za stečajnog upravnika imenuje se Besim Hamidović iz Zvornika ul. Križevići 173, Gušteri.

IV-Pozivaju se povjerioci da u roku od 30 (trideset) dana, od dana objavljivanja oglasa o otvaranju stečajnog postupka u „Službenim novinama F BiH“ prijave svoja potraživanja stečajnom sudu dostavom prijave i priloga u dva primjerka u skladu sa odredbama Zakona o stečajnom postupku o prijavi potraživanja (član 110. Zakona), te prilože dokaz o uplaćenju sudskoj taksi na prijavu potraživanja u iznosu od 1% od vrijednosti potraživanja, s tim da taksa ne može biti manja od 50,00 KM, niti veća od 10.000,00 KM, na žiro račun broj 1321000256000080, vrsta prihoda 722221, primalac Budžet Tuzlanskog kantona.

V-Pozivaju se povjerioci da u roku od 30 (trideset) dana, od dana objavljivanja oglasa o otvaranju stečajnog postupka u „Službenim novinama F BiH“ stečajnog upravnika obavijeste koja prava osiguranja potražuju na predmetima imovine stečajnog dužnika. Potrebno je navesti predmet na kome se potražuje pravo osiguranja, vrstu i razlog nastanka prava osiguranja kao i osigurano potraživanje.

VI-Pozivaju se lica koja imaju obaveze prema stečajnom dužniku da ih bez odlaganja izvrše.

VII-Otvaranje stečajnog postupka ima se upisati u sudski registar Općinskog suda u Tuzli, zemljišne knjige Općinskog suda u Lukavcu, te kod Službe za geodetske i imovinsko-pravne poslove općine Lukavac.

VIII-Skupština povjerilaca (ročište za ispitivanje) na kojem će se ispitati prijavljena potraživanja **zakazuje se za dan PETAK 18.02.2022.godine u 09,00 sati, u zgradi Općinskog suda u Tuzli, ulica ZAVNOBIH-a bb, sudnica S4-prizemlje.**

IX-Skupština povjerilaca (izvještajno ročište) na kome će se na osnovu izvještaja stečajnog upravnika odlučiti o daljem toku stečajnog postupka održat će se istog dana tj. PETAK 18.02.2022.godine na istom mjestu nakon ročišta za ispitivanje prijava potraživanja.

X-Rješenje o otvaranju stečajnog postupka u cijelosti objavit će se na oglasnoj tabli suda, web-stranici suda—elektronskoj tabli suda, na internet stranici FIA-e, a u Službenim novinama F BiH objavit će se samo izreka rješenja.

O b r a z l o ž e n j e

Rješenjem ovoga suda broj 32 0 L 368437 19 L od 07.01.2020.godine, otvoren je postupak likvidacije nad Opšta zadruga "Povratak" sa potpunom odgovornošću (p.o.) Tuzla, Slatina br. 11, a Rješenjem suda broj 32 0 L 3368437 19 L od 25.03.2021.godine obustavljen je postupak likvidacije nad dužnikom, temeljem odredbe čl. 9. st. 2. Zakona o likvidacionom postupku (Sl. novine F BiH br.29/03), radi nemogućnosti društva da izmiri obaveze koje ima prema povjeriocima koji su u likvidaciji prijavili svoja potraživanja. Rješenje o obustavi likvidacionog postupka postalo je pravosnažno 19.04.2021.godine.

Na ročištu za ispitivanje prijava potraživanja u likvidacionom postupku održanom dana 24.03.2021.godine likvidator je izjavio da su dvije prijave blagovremene i to povjerioca Mitra Mihajlović u iznosu od 25.989,76 KM i Kantonalnog poreznog ureda Tuzla u iznosu od 4.277,42 KM, a koje prijave je likvidator i priznao, dok nije priznao prijavu Mitra Mihajlovića podnesenu putem punomoćnika Mirjane Šarkinović od 14.07.2020.godine jer je ista neblagovremena. Likvidator je primio na znanje i zahtjev Gordane Trišić vezano za povrat osnivačkog udjela u iznosu od 350,00 KM, te naveo da tek nakon što bi se namirili svi povjerioci sa svojim potraživanjima i ako preostane dodatnih sredstava, ta sredstva će se podijeliti osnivačima srazmjerno njihovim osnivačkim udjelima. Međutim, likvidator je utvrdio da likvidacioni dužnik nema novčanih sredstava da su mu poslovni računi ugašeni, da nema pokretnih imovine jer mu niko od osnivača niti ovlaštenih lica zadruge nije predao u posjed nijednu pokretnu stvar, a dio pokretnih stvari je otuđen što je prijavljeno i MUP-u TK. Likvidator je također utvrdio da ukupna vrijednost imovine, odnosno nekretnina Opšte zadruge "Povratak" sa p.o. Tuzla za parcelu 1838/1 KO Stupari, površine 2215 m2 iznosi 3.322,50 KM (parcela je sporna jer postoje prava trećih lica) i za parcelu 389/2, 389/3 i 389/4 KO Mičijevići ukupne površine 1.203 m2 iznosi 3.609,00 KM, te kad se uzme u obzir da je Likvidator priznao kao osnovana potraživanja: Mihajlović Mitra u iznosu od 25.989,76 KM i Kantonalnoj poreznoj upravi Tuzla u iznosu od 4.246,62 KM, jasno je da su potraživanja povjerilaca daleko veća od imovine i da Opšta zadruga "Povratak" sa p.o. Tuzla nema sredstava ni za vođenje likvidacionog postupka, zbog čega je likvidator, predložio da se u smislu člana 9, stav 2. Zakona o likvidacionom postupku od strane Likvidatora podnese prijedlog za otvaranje stečajnog postupka nad Opštom zadrugom "Povratak" sa p.o. Tuzla, a nakon što sud obustavi likvidacioni postupak, što je likvidator i učinio te dana 01.04.2021.godine podnio prijedlog za otvaranje stečajnog postupka.

Imajući u vidu da je prijedlog za otvaranje stečajnog postupka podnio likvidator, sud je shodno odredbi čl. 102 stav. 6. Zakona o stečaju FBiH (Službene novine F BiH broj 53/21), Rješenjem ovog suda, broj gornji od 15.09.2021.godine pozvao povjerioce i zainteresirana lica da u roku od 30 dana od dana objavljivanja istog uplate predujam za obezbjeđenje troškova stečajnog postupka, koje rješenje je objavljeno u Službenim novinama FBiH broj: 75/21 dana 22.09.2021.godine.

Na osnovu izvještaja likvidatora datog u toku likvidacionog postupka sud je utvrdio da dužnik nema imovine iz koje bi se namirila potraživanja povjerilaca, ali da je prijedlog za pokretanje stečajnog postupka dopušten, zbog nesolventnosti i nelikvidnosti dužnika postoji stečajni razlog, a troškovi stečajnog postupka biti će podmireni iz predujma troškova uplaćenih od strane zainteresiranog lica Dragić Mladena dana 27.10.2021.godine (iznos 2.000,00 KM).

Sud je shodno odredbi člana 102., stav 6., a u vezi sa članom 103. stav. 1 Zakona o stečaju F BiH (Službene novine F BiH broj 53/21), odlučio kao u izreci rješenja.

Odluku o imenovanju stečajnog upravnika, sud je donio shodno odredbi člana 104. stav 1. Zakona o stečaju F BiH (Službene novine F BiH broj 53/21) , a nakon što je utvrdio da isti ispunjava uslove utvrđene odredbom člana 71. istog zakona.

Sud je, odluku o određivanju ročišta za ispitivanje prijavljenih potraživanja i izvještajnog ročišta, donio na osnovu člana 106. Zakona o stečaju F BiH (Službene novine F BiH broj 53/21).

Odluku o objavljivanju otvaranja stečajnog postupka, sud je donio shodno odredbi člana 107. stav 1. Zakona o stečaju F BiH (Službene novine F BiH broj 53/21).

Na osnovu odredbe člana 105. Zakona o stečaju F BiH (Službene novine F BiH broj 53/21), sud je uputio odgovarajuće pozive povjeriocima i dužnicima stečajnog dužnika.

Upis otvaranja stečajnog postupka u javne registre određen je na osnovu odredbe člana 108. Zakona o stečaju F BiH (Službene novine F BiH broj 53/21).

**Stečajni sudija
Antonela Đaković**

POUKA O PRAVNOM LIJEKU: Protiv ovog rješenja žalbu može izjaviti stečajni dužnik. Žalba se podnosi Kantonalnom sudu u Tuzli, putem ovog suda u tri primjerka, u roku od 8 dana po proteku 5 radnih dana od dana objave rješenja u Sl. novinama FBiH. Žalba iz prethodnog stava ne odgađa izvršenje rješenja.